

POBREZIAREN AURKAKO BILERA. Giza laguntzarako erakundeek Washingtonek diru gutxi ematen duela salatu dute

Garapenerako plana hitzartuko dute gaur eta bihar nazioarteko agintariek

Agentziak | MONTERREY

Nazio Batuen Erakundeak proposaturiko Monterreyko Adostasuna deritzon agiria onartuko dute bihartik aurrera nazioarteko 60 gobernu eta estatuburuk Mexikoko iparraldeko hiri horretan astelehenean hasiriko goi bileran.

Besteak beste, Ameriketako Estatu Batuetako presidente George W. Bush eta Kubako presidente Fidel Castro elkartuko dituen goi bileran, herri txiroen garapenerako finantzazioaz mintzatu dira nazioarteko ordezkariak.

Mundializazio liberalaren aurka Monterreyn bildu diren gobernu kanpoko erakundeak kexu dira Nazio Batuen Erakundeak mugak ezarri dizkielako astelehenean hasi zen batzarrean parte hartzeko. «Saioa hasteko hamar minutu falta zirela batzarrean bederatzi eserleku soilik izango genituela esan ziguten, nahiz eta hemen mundu osoko ehunka gobernu kanpoko erakunde gauden», esan zuten koordinazioaz arduraturiko taldearen eledunek.

Ehunka manifestarik protesta martxa egin zuten atzo nazioarteko batzarraren egoitzaraino. Gerrillari zapatisten aldeko leloak oihukatu eta nazioarteko diru erakundeak irudikatzen zituen hilkutxa erre zuten.

Estatu Batuen «zekenkeria» salatu dute

Giza laguntzarako Washingtonek ematen duen diruaren urritasuna salatu dute nazioarteko agintarien aurrean gobernu kanpoko erakundeek. Nazio Batuen Erakundeak herrialde garatuei barne produktu gordinaren %0,7 emateko ezarritako konpromisoan atzera egin dute hainbat estatuk. Azken urteotan %0,33tik %0,22ra murriztu da laguntza. Estatu Batuak dira laguntzarik txikiena ematen dutenak —%0,1—, Gobernu kanpoko erakundeek salatu dutenez.



JOSE LUIS MAGANA / AP

Mundializazioaren aurkako manifestariak, protestan, Monterreyko batzarraren egoitzaren aurrean, atzo.

Monterreyko minigonak

NBE-REN BATZARRA MEXIKON. Nazio Batuen Erakundeak onartu du Mexikoko iparraldeko hirian egiten ari den batzarrerako aurreikusitako helburuak ez direla beteko

Edu Lartanguren | DONOSTIA

Demokrazia kalean eta ohean», aldarrikatu zuten ironiaz beteriko manifestazioan minigonaz jantziriko Mexikoko 100 feministek, igandean, Nazio Batuen Erakundeak munduko herri txiroen garapena bultzatzeko Monterreyn antolatutako goi bileraren bezperan. Gaur eta bihar munduko agintari ugari dira ironia urriz biltzekoak Mexikoko iparraldeko hirian, Monterreyko adostasuna deituriko agiria bultzatzeko. NBEk bultzaturiko akordioak garapenerako laguntzak bikoiztea helburu duen arren, litekeena da ostiralean erdiestekoa den adostasuna feministen gonak baino motzagoa izatea.

«Bistan da ez ditugula beteko garapenaren finantzaketaren inguruan goi bilera honetarako genituen helburuak», esan du Kofi Annan NBEko idazkari nagusiak. Halere, botila erdi beterik ikusi nahi izan zuen Annanek, eta munduan miseria gorrian diren 1.200 milioi laguneko egoera leuntzeko, herrialde garatuek Monterreyn 50.000 mi-

lio dolarreko konpromisoa hartuko dutela baieztatu zuen. Kanpo zorra arintzea ez zegoela eztabaida zerrendan gaineratu zuen.

«Herri txiroei laguntzeko konpromiso zehatzik ez dago, agiriaren hitzak oso lausoak dira Estatu Batuen ordezkariak hala eskatuta», esan du Rogelio Ramirez Mexiko hiriko ekonomistak. «Estatu Batuek nabarmendu dutenez, Monterreyko adostasuna behin betiko agiria da, eta ezingo da goi bileran aldatu. Jadanik itxiriko akordioa da», gaineratu zuen.

Nazio Batuetan ordezkaritza duten herrialde gehienetako kideek hartuko dute parte bileran; eta, lehen aldiz, Munduko Bankuak eta Nazioarteko Diru Funtsak.

Munduko Bankuan urduritasuna nagusitu da Estatu Batuek eta Europako Batasunak herri txiroentzako laguntzak finantzatzeko akordiorik lortu ez dutela eta. Laguntzarako dirutzak aurki agortuko diren beldur, laguntzarako dirutza bikoizteko eskatu du Munduko Bankuko presidente James Wolfensohnek.

Etxe Zuriak laguntzak onartu arren, Kongresuak du haiek berresteko azken hitza. Kongresu-kideak laguntza politikaren aurka agertu ohi dira iraganean, eta hori dela-eta, urduri da Brusela Estatu Batuek azkenean harturiko konpromisoak beteko ez dituztelakoan.

NBEk idatzirik Monterreyko adostasunaren agiriak laguntzen garrantzia nabarmentzeaz gain, munduko merkataritzaren «garapen orekatuaren» eta herrialde pobreetan «politika osasuntsuen» alde egiten du.

«Politika osasuntsuak»

«Horrekin zera esan nahi dute: gastu sozialak murriztu eta gure nekazarien babesak gutxitu nahi dituztela, eta bien bitartean, garaturiko estatuek beren nekazariak babesteko 300 bilioi dolar gastatzen dituzte urtero», esan du Maria Atilano Monterreyn diren mundializazioaren 7.000 aurkariaren eledunetako batek. Adostasunean «kopururik ez dago, ezta konpromisorik edo egutegirik ere», kexu zen ATTAC taldeko ordezkari Louis Weber.

Rio de Janeiron 1992an egi-

MUNDUKO DESOREKA

Txiroak eta aberatsak mahai berean

Monterreyn bilduriko estatuek munduko herri txiroen laguntzez eta haiekiko merkataritza harremanak zuzentzeko neurriez mintzatu dira. Hona hemen arlo horietako ezaugarri nagusiak.

GOI BILERAREN HELBURUAK.

Oinarrizko hezkuntza mundu osoan bermatzea, munduko pobrezia erdira murriztea eta 2015. urterako haurren heriotza tasa bi heren gutxitzea.

EGUNGO GABEZIAK.

Helburuok gauzatzeko 40 eta 60 bilioi dolar gehiago beharko lirakeke, Munduko Bankuaren arabera. Giza laguntzarako elkarrean aburuz, berriaz, 100 bilioi dolar beharko lirakeke.

MERKATARITZAKO OZTOPOAK.

Monterreyn bilduriko Mendebaldeko estatuak merkatuak irekitzearen alde mintzatzeko bitartean, oztopo ugari jartzen dizkiete garatu gabeko herrialdeetatik datozen produktuei, batez ere, nekazaritza gaiak.

MUNDIALIZAZIOAREN AURKAKOEN ESKAERAK.

Monterreyn hainbat ekitaldi antolatu dituzten taldeok zera eskatzen dute, besteak beste: Nazioarteko diru erakundeek erabakiak demokratizatzea, zorren kontuak epaitzeko auzitegi independentea eratzea eta herri txiroen produktuentzat munduko merkatuak irekitzea.

niko bileran barne produktu gordinaren %0,7 garapenerako emango zutela agindu arren, soilik bost estatu —Holanda, Danimarka, Norvegia, Suedia eta Luxenburgok— heltzen dira egun kopuru horretara. NBEren arabera 860 milioi lagunek ez dute behar bezalako elikadurarik, eta urtero 11 milioi haur hiltzen dira saihesteko moduko arazoak direla eta.

Monterreyko udala, bitartean, 200 metro luze eta bi metro garaiko horma eraikitzen ari da, bileran parte hartzen ari diren nazioarteko agintariek La Fundidora txabola auzoa ikusterik izan ez dezaten.